

# NA SIMA YESU

## AYAKI PE ABENGAKI



Santu Yoane, mokapo ya 11, kobanda na molongo ya 18, nalingi kotánga.

*Nzokande Betania ezalaki pene na Yelusaleme, kilometre soki misato:*

*Bongo Bayuda mingi bayaki epai ya Malatá ná Maria, mpo na kobondisa bango mpo na ndeko na bango ya mobali.*

*Na yango Malatá, ntango ayokaki ete Yesu azali koya, akendeki kokutana na ye: kasi Maria atikalaki bobele na ndako.*

*Bongo Malatá alobaki na Yesu ete, Nkolo, soki ozalaki awa, mbele ndeko na ngai ya mobali akufi te.*

*Kasi nayebi ete, ata sikawa, nyonso okosenga... Nzambe, Nzambe akopesa yo yango.*

*Yesu alobaki na ye ete, Ndeko na yo ya mobali akosekwa.*

*Malatá alobaki na ye ete, Nayebi ete akosekwa na lisekwa na mokolo ya suka.*

*Yesu alobaki na ye ete, Ngai nazali lisekwa, pe... bomoi: moto oyo azali kondimela ngai, ata soki akufi, akozonga na bomoi:*

*Pe moto nyonso oyo azali na bomoi pe azali kondimela ngai, akokufa mokolo moko te. Ondimi yango?*

*Alobaki na ye ete, Iyo, Nkolo: nandimi ete yo ozali Klisto, Mwana na Nzambe, oyo azali koya na mokili. (Pe bótala yango malamumu!)*

*Pe ntango alobaki bongo, akendeki kobenga ndeko na ye Maria, alobi na ye na nkuku ete, Motei ayei, pe azali kobenga yo.*

<sup>2</sup> Tóbondela. Tata na Likolo, kokisa Maloba yango na mitema na biso, na mpokwa oyo, wana tozali kotalela Yo sikawa. Liloba na Yo, mosali na Yo pe eteni etángami, topesi nyonso na maboko na Yo, na Nkombo na Yesu Klisto. Amen.

Bokoki kofanda.

<sup>3</sup> Ntina oyo ememi ngai awa, ezali mpo na koluka kosunga libota na Nzambe. Ezali mpenza mpo na kobondela pe kotia maboko na babeli te, kasi ezali mpo bákoka komona Yesu Klisto

kati na biso, Mwana na Nzambe kati na biso. Na mpokwa oyo tokolobela liteya oyo: *Na Sima Yesu Ayaki Pe Abengaki.*

<sup>4</sup> Sikawa, eleko tozali kolobela, esalemalaki na eleko moko ya mawa mpenza. Soki bosíli kotánga lisolo ya bomoi ya Nkolo na biso, tomoni ete Azalaki Moninga mpenza ya elenge mobali oyo, Lazálo. Azalaki. . . Sima na Yosefe kokufa, to, Ye alongwaki pe Ayaki kofanda elongo na Malatá, Malía ná Lazálo. Pe bazalaki baninga mpenza. Bazalaki na. . . Azalaki lokola mokengeli mpo na bango, mo—Moinga ya motema. Pe batongelaki Ye bilamba ya kolata, mokoto ya kolata, nabanzi, ndenge balobaka, pe ezalaki kolítama mobimba kozanga kosonama. Pe basalelaki Ye makambo mosusu, mpo bandimelaki Ye. Ezalaki, ba—bandimaki mpenza pe bamonaki yango. Babimaki na lingomba, pe nyonso wana, mpo na kolanda Ye. Ezalaki likambo monene na ntango wana, ezalaki, etúmbu na yango ekokaki kozala ata liwa, ko—kobima na lingomba.

<sup>5</sup> Kasi, Yesu, Moto oyo azalaki kokende bipai na bipai, ndenge bazalaki koloba, mpo na kopanza mangomba na bango, koloba makambo mabe mpo na ba-nganganzambe na bango, pe—pe nyonso wana, bakanisaki ete Asalelaki—Asalelaki bango mabe mingi. Pe—pe komeka kotatola Ye basengelaki ata ko—kobengana ye na basinagóga. Pe soki ozali moto ya lingomba te, ba—bazalaki kokanisa ete ozalaki na—na libaku ya kosikolama te. Soki ozali mondimi na moko na binzambi-nzambi na bango te, ndakisa Bafalisai, Basadukai, to lingomba moko boye, lisiko ezalaki te, soki ozalaki libanda na yango. Pe soki bazalaki na makoki, mafungola, bakokaki kobengana yo, soki balingi. Ezalaki maloba na bango moko. Kokamwa te ndenge Yesu alobaki: “Na mimesano na bino, boyeisi Liloba na Nzambe mpamba.” Bomoni?

<sup>6</sup> Pe sikawa ekómi kosalema lisusu, mpo biso nyonso toyebi ete makambo ya kala ezungaka kosalema mbala na mbala. Pe ezali—ezali mawa mpo na koloba yango, kasi esakolamaki ete ekosalema lisusu, pe ekómi kosalema lisusu.

Tomoni ete bato bazalaki kosepela na Yesu te.

<sup>7</sup> Mbala mingi, bato balingaka kokata makambo ya bato oyo bazali na boyokani na bango te. Tosengeli kosala bongo te. Tokoki kozanga koyokana moko na mosusu, kasi kokoba kozala baninga. Soki nakoki te kozanga koyokana na moto, pe kokoba kolinga ye pe kobondela mpo na ye, pe kozanga koyokana na ye na- . . . na ye likolo na Makomi, mpo na lisosoli ya malamau koleka, na bongo nakolobela ye eloko moko te. Nakolinga ntango nyonso kozanga boyokani na ye, kasi kozala na ye malamau, mpo nalingi ye, pe na ntembe te, na—nakolinga te ete ábunga. Ye pe asengeli kosala motindo moko mpo na ngai; tolingi kobunga te. Pe tosengeli kotonga makanisi na biso likolo na oyo Liloba elobi. Tika ete Liloba ézala Solo. Bindimeli na biso to makanisi na biso

te, kasi makambo Ye alobi; ndimbola na biso moko te, bobele makambo Liloba elobi.

<sup>8</sup> Na mpokwa mosusu, nasalaki likambo moko oyo emonanaki lokola likambo ya kotúka mwa moke, nakanisi esalemaki na kolia bilei-ya-ntongo na likita ya basali, na ntongo mosusu. Namemaki Yesu na esambiselo. Nalobaki: “Lelo oyo, bato bazali kosala makambo ndenge basalaki na eleko wana.” Ntango mosusu ekozala malamú soki nazongeli yango mwa moke, soki tokozala na ntango. Sikawa, nalobaki, lelo, tozali komona ete . . .

<sup>9</sup> Na mbongwana-ya-makambo ya Luther, ye, na eleko wana, alobaki ete moyengebene akobika na kondima. “Moto oyo andimi, ye, moto azali na Yango.” Kasi tomonaki ete mingi kati na bango balobaki ete bandimaki, pe bazalaki na Yango te.

<sup>10</sup> Na mikolo ya—ya John Wesley, soki bazalaki na lipamboli ya mibale, babengaki yango, kobulisama, kobulisama mobimba, bazalaki kosepela pe kogánga. “Moto nyonso oyo azalaki koganga, azalaki na Yango.” Kasi bamonaki ete bazalaki na Yango te. Mingi kati na bango bagángáki, pe bazalaki na Yango te.

<sup>11</sup> Na mikolo ya Pantekote, balobaki: “Sikawa bozongisami ya makabo esili koya, libatisi ya Molimo Mosantu. Moto oyo akoloba minoko ya sika, azali na Yango.” Tomoni ete bato mingi balobaki minoko ya sika, pe bazalaki na Yango te.

<sup>12</sup> Na bongo, bakómi koloba: “Ee, mbuma ya Molimo, ezali nde Yango.” Oh, te, ezali mbuma ya Molimo te. Bato ya Science Chrétienne bazali na yango, esika na mpasi . . . Bolingo ezali mbuma ya Molimo. Na bongo, bango bazali na bolingo koleka moto nyonso, kasi bandimaka Bonzambe ya Yesu Klisto te; balobaka Ye azali bobele mosakoli, moto lokola bato nyonso. Bomoni? Na bongo, ezali yango te.

<sup>13</sup> Bótika nátuna naino motuna moko. Tómema Yesu na esambiselo. Pe tika ete Nzambe álimbisa ngai mpo na maloba oyo, longwa na etumbelo, kasi nakotelemela Ye mwa moke, bobele mpo na komemela bino Pole. Bomoni?

<sup>14</sup> “Sikawa nazali na bino baoyo bozali awa na mpokwa oyo; nazali koloba na bino. Na . . .” (Ezaleaki kuna na ntango ya kala, ntango Yesu ya Nazaléte azalaki na mokili.) “Nayei epai na bino, mpo tókanisa elongo na bino mpo na kotelemela moto oyo, Yesu ya Nazaléte. Sikawa biso nyonso toyebi ete Nzambe azali bolingo. Biblia elobi ete Azali bongo. Malamú, pe bolingo, Molimo ezali motema molai, boboto, bolamu, bopolo, pe bongo na bongo, pe bolingo. Sikawa nalobi, nalingi kotuna bino likambo moko. Tokozua likambo—likambo biso toyebi, Moklisto.

<sup>15</sup> “Bótala mobange nganganzambe na bino oyo. Tata ya tata ya tata ya nkoko na ye azalaki nganganzambe.

Asengelaki kobotama na molongo wana ya Balewi, mpo ázala nganganzambe. Tomoni, sikawa, ete abikaka bomoi ya bolenge lokola bamosusu kati na bino te. Asalaka nini? Amipesaka mbeka, azalaka kuna, na likolo, mpo na koyekola Liloba, Liloba na Nzambe. Ayekolaka yango butu pe moi, butu pe moi, asengeli koyeba nkomá na yango moko na moko, liloba moko na moko oyo ekomami na buku. Asengeli koyeba yango na motó. Ye—ye, esengelaki na ye mpenza koyeba yango.

16 “Na sima, libanda na yango, ntango tata ná mama na bino babalanaki, nani asangisaki bango lokola mwasi ná mobali? Mobange mosantu nganganzambe na bino. Nani azalaki koya epai ya tata na bino ntango azalaki na bosenga pe asengelaki kodéfa mwa mbongo mpo na elanga na ye, oyo badéfisi balingaki kobotola? Nani asungaki ye? Mobange malamumu ya nganganzambe na bino. Nani asungaki mama na bino kuna na lopitalo, ntango azalaki kobota yo? Mobange malamumu ya nganganzambe. Nani ayaka epai na yo ntango ozalaka na bokono pe na bosenga? Mobange malamumu ya nganganzambe na bino. Nani apambolaki yo, abulisaki yo epai na Nzambe pe akataki yo ngenga mokolo ya mwambe? Mobange malamumu ya nganganzambe na bino. Ntango tata ná mama na bino balingaki kokabwana, nani asangisaki bango lisusu, asalaki ete bákabwana te? Mobange malamumu ya nganganzambe na bino. Ntango mpasi ekómaka pembeni na bino, nani atalaka makambo yango? Mobange malamumu ya nganganzambe na bino. Na ntembe te.

17 “Sikawa mobange malamumu ya nganganzambe yango ayebi ete Biblia elobi ete Nzambe asengeli na mwana-mpate mpo na mbeka. Mingi kati na bino bazali bato ya mombongo, na bongo bobókolaka ba-mpate te, kasi Nzambe asengi mpate. Basalaki mapángo ya bibwele kuna, bazalaki koteka ba-mpate na bango mpo ba—bato ya mombongo bákoka kokende kosomba yango kuna, bopesa mbeka mpo na milimo na bango, yango nde Nzambe asengi.

18 “Elenge mobali oyo na nkombo Yesu asalaki nini? Ye autaki mpenza wapi? Alobaki ete abotamaki, na kobotama ya mongondo. Nani asilá koyoka likambo ya boléma boye? Toyebi ete mama na ye akumbaki zemi na ye liboso ye ná Yosefe bábotama, to, liboso ye ná Yosefe bábalana, ye abotamaki. Sikawa tomoni ete azalaki—azalaki kotiolama, longwa na ebandeli.

19 “Azali na kalati ya lingomba nini? Soki azalaki moto mosantu, etóngá nini asanganaki na yango? Ntango nganganzambe na bino azalaki koyekola, koyekola, koyekola, koyekola, mpo na koyeba Liloba yango, tálá ye ayei kobuka makambo oyo ye atongaki. Bokobenga yango likambo ‘ya Nzambe’? Ata moke te.

20 “Sikawa, mokolo mosusu, ntango nganganzambe na bino abongisaki esika wana, kuna, ya... esika bokokaki kosomba mbeka, elenge mobali oyo asalaki nini? Bolamu? Abetaki, asangisaki ba-nsinga, elamba ya molikani ná ya mposo ya nyama, pe atalaki bato yango na nkánda; abukaki ba-mésa yango, pe abetaki bango mpo na kobimisa bango libanda. Pe bobengi yango mbuma ya Molimo, ndenge atalaki bango na nkánda? Pe, bótala, azángisaki bato libaku ya kosámbela Yahwé! Moto ya mombongo azali na mposa ya kosámbela Ye; abókolaka bana-mpate te, pe akendeki kosomba yango kuna. Kasi Ye akweisaki yango na nse, abétaki bango, pe abenganaki bango libanda.”

21 Nani azali na mbuma ya Molimo kuna? Bomoni? Yango mpenza. Bomoni, ezali mbuma ya Molimo te, ezali koloba minoko ya sika te, ezali kogánga te.

22 Bokoloba: “Na bongo, Ndeko Branham, ndangá yango ezali nini? Ndangá yango ezali nini?” Kotatolama ya Liloba na eleko.

23 Bazalaki na Biblia. Azalaki mpenza lolenge Yahwé alobáká ete ekosalema. Ezali na ntina ya ndimbola moko te. Elimbolamaki kuna. Ba-nganganzambe na bino bazalaki wana, nyonso bazalaki na yango ezalaki wana, pe makambo mosusu nyonso ezalaki kosalema bo-momesano pe nyonso wana, kasi, ata bongo, bazangaki komona Liloba. Pe Ye moto apesaki bomoi na Liloba yango na eleko wana. Yango nde ndangá ya eleko wana.

24 Luther azalaki na ndangá ya eleko na ye, Wesley na oyo ya eleko na ye, Pantekote na oyo ya eleko na yango, kasi biso tozali na eleko mosusu. Makambo yango ezali malamu. Kasi, ezali lokola mwana moke, azali na mosapi, liso, pe zólo, kasi sima na ntango moke, asengeli kokóma moto. Asengeli kokóma mwa—mwana oyo akóli; na ntango wana akobotama, azali na bomoto ya kati, nzoto pe molimo, akoki kotambola.

25 Sikawa tomoni ete nyonso oyo, Yesu asilaki koloba yango, pe bobele bato moke, bobele baoyo Abongisáká mpo na Bomoi bamonaki Ye. Ezalaki boike na bato mingi te; bato na Ye bakokaki kozala ata moke te lokola bato ya Kaifa. Ee, Kaifa akokaki kosangisa bato ya ekólo mobimba. Yesu asangisaki bobele bato moke. Bato mingi te nde bayebaki Ye. Bato bazalaki ba-nkóto na ba-nkóto, ntango Ayaki na mokili. Alekaki na mokili, kasi bayebaki ata moke te ete Azalaki awa.

26 Ekozala lisusu pe bongo! Akoya epai na baoyo babéngámá mpo na Bomoi. Ayebi nani abéngámá mpo na Bomoi. Pe Ako... Ezali mosala na Ye mpo na kotalela likambo yango.

27 Sikawa tomoni ete, sima na bango kobima na lingomba, bandimelaki Ye. Makambo nyonso Liloba ezalaki koloba mpo na Ye, Azalaki yango.

28 Pe mokolo moko Abimaki na ndako na bango. Nalingi kolobela makambo misato: Yesu abimaki; liwa eyaki; pe bakomaki na suka. Nalingi kolobela na miniti moke makambo misato yango.

29 Yesu abimaki. Pe ntango Abimaki, mindondo ekotaki. Sikawa, ntango Atiki yo, to ndako na yo, esika ofandaka, mindondo ezali na nzela. Ekuke efungwameli Satana polele, ntango Yesu abimi.

30 Akendeki, pe—pe bobele ntango Abimaki, mbala moko liwa ekotaki. Pe ntango Yesu abimi, liwa ekoti. Kokabwana na Ye ezali liwa, bongo liwa ekotaki ntango Yesu abimaki.

31 Pe liwa ewumelaki na Lazálo. Bongo Moto oyo bandimelaki pe balingaki, babengisaki Ye mpo na koya kobondela mpo na Lazálo, mpo basilaki komona Ye pe koyeba ete Ayebaki Nzambe, ete: “Likambo nyonso, Nzambe...” Malatá alobaki yango kuna: “Likambo nyonso Okoloba na Nzambe sikawa, Nzambe akosala yango.” Asosolaki ete Ye ná Nzambe bazalaki Moko. Azalaki Liloba ya eleko, bongo, asosolaki yango. Pe ayebaki, soki akokaki kokutana na Ye, kasi Asilaki kobima pe bakokaki kozua nsango na Ye te. Pe babengisaki Ye, kasi, esika na Ye koya, Akendeki mosika koleka. Na sima, babengisaki Ye lisusu, kasi, esika na Ye koya, Akendeki mosika koleka.

32 Mbala mosusu tomitunaka mpo na nini makambo yango esalemaka, kasi Makomi elobi te ete: “Makambo nyonso esalemaka mpo na bolamu ya baoyo balingi Nzambe”? Ayebi makambo Azali kosala. Soki Aumeli, ezali malamumu. Ayebi makambo Azali kosala. Ntina moko ezalaki.

33 Tomoni ete Alobaki, na Santu Yoane 5:19: “Solo, solo, Nalobi na bino, Mwana akoki kosala likambo Ye moko te, kasi bobele yango emoni Ye Tata kosala.”

34 Tata moto ayebisaki Ye ete ákende mosika, pe ázala mosika mpenza na mikolo nyonso wana. Sima na mikolo yango kokoka, na bongo Alobaki makambo Alobaki na ntango wana, ete: “Moninga na biso Lazálo alali mpongi.”

Pe alobaki: “Ee, asali malamumu.”

35 Alobaki: “Asili kokufa. Pe mpo na bino, Nasepeli ndenge Nazalaki kuna te.” Mpamba te, bazalaki koluka komema Ye kokende epai na ye, mpo na kobikisa ye to koloba likambo nini esengelaki kosalema. Kasi Ye ayebaki likambo nini esengelaki kosalema, na bongo Asalaki mpenza likambo oyo esiláki kobongisama mpo na Ye kosala: kozala mosika. Soki bomoni Ye na nkunda, ntango Azongaki. Alobaki yango ntango Azongaki pe Amonaki ndako yango.

36 Bakomaki na suka. Lazálo asilaki kokufa. Ngonga nyonso, bazalaki kokanisa: “Akoki komonana. Akoki komonana. Akoki kozonga.” Sukasuka, akufaki, mpema etikaki ye.

37 Babimaki, bakaukisaki ye, balongolaki makila na nzoto na ye, bazingaki ye na elamba ya molikani, batiaki malasi, bakaukisaki ye pe batiaki ye na nkunda, batiaki libanga likolo na nkunda yango, ezalaki momesano na bango ya kokunda bibembe na ntango wana. Libulu na mabelé, ntango mosusu kati na libanga, pe batiaki libanga likolo na yango, ezalaki momesano na bango.

38 Mokolo ya liboso elekaki, mokolo ya mibale elekaki, mokolo ya misato elekaki, mokolo ya minei elekaki, moto yango abandaki kopola na kati ya nkunda. Ntango mosusu zólo na ye esilaki kolongwa. Nakanisi ete yango nde eloko ya liboso oyo elongwaka, ezali zólo. Pe asilaki kobanda kopola. Mosuni na ye—ye esilaki kozonga na mputulu ya mabelé, to ebandaki kozonga. Bomoto na ye ya kati ebimaki pe ezalaki na mobembo ya mikolo minei, mosika na ye.

39 Elikia nyonso ya komona ye lisusu, na mokili oyo, esilaki nye. Na bongo, ntango bakomaki na suka. . . Bazalaki kozela: “Ntango mosusu, Akoya mokolo ya liboso, mokolo ya mibale!” Te. Na sima akufaki, pe Ayaki te. Na bongo, kozanga elikia ekotaki.

40 Sima na ntango moke, ezalaki na moto moko oyo ayebisaki ye: “Motei azali libanda.” Malatá abimaki na balabala!

41 Yesu ayaki na ngonga yango ya molili, ntango bakomaki na suka. Ezalaka mpenza na ntango wana nde Ayáka. Bomoni? Ayáka mpenza na ntango yango ya molili makasi, nde Yesu amonanaka pe akótaka na mosala.

42 Sikawa bótala malamú, Ayaki pe Abengaki Malatá. Bozali na Ye epesaki elikia ya sika. Ata elenge mobali yango akufaki, kasi Bozali na Ye epesaki elikia ya sika.

43 Okoki kozala awa na mpokwa oyo, moninga na ngai, wana minganga balembi yo, ná bokono ya cancer, mpasi ya motema. Ntango mosusu ozali na kiti-ya-bibosono, mobosono, zebi mobimba elobi ete mpo na yo, elikia ata moke ezali te; liboke ya calcium e—etingami na mi—mi—mikuwa na yo, pe okoki lisusu kogumba yango te. To, mo—motema na yo ebebi mingi, na lolenge ete monganga alobi ete okoki kokufa sima na miniti moko to mosusu. Oh, pe bato mingi mpenza bazali na cancer pe tuberculose, ntango mosusu ezalaki elikia na bino ya suka, pe emonani lokola minganga balembi bino. Ata bongo, kozala liboso na Bozali pe kososola Bozali ya Yesu Klisto, epesaka lisusu elikia.

44 Moto moko akoki ata kotángela yo nkombo na yango. Ntango mosusu oyóká naino yango te, kasi soki moto moko alobi: “Nayebi esika losambo moko ezali, bandimelaka Nzambe pe babondelaka mpo na babeli,” noki-noki (Sikawa, okomi pene na kokufa. Bomoni?), elikia ya sika emati. Ezalaka ntango nyonso bongo. Na ngonga yango ya molili, mbala mingi, na ntango wana

nde moto moko alobaka likambo moko mpo na yango, kolobela yo mpo na Yesu. Bozali na Ye epesaki elikia ya sika.

<sup>45</sup> Tika ete ésala motindo moko na mpokwa oyo, ndenge esalaki lobi na mpokwa. Ntango tomoni Liloba oyo etatolami koleka ntembe nyonso, oyo etatolami pe endimisami polele ete Yesu oyo azalaki na bomoi eleki mibu nkóto moko na nkama libwa, oyo akufaki na Kalvari, asekwaki mokolo ya misato, amonanaki na bayekoli wana pe afungolaki miso na bango, pe apesaki elaka mpo na eleko oyo, azali awa na mpokwa oyo elongo na biso sikawa, yango esengeli kopesa bato elikia. Elikia ya sika engengisaka.

<sup>46</sup> Ntango mosusu moto moko alobaki: “Lingomba esilaki na yango kokauka mwa moke, eleki mwa ntango. Tozuaki mai malamau ya pio te na—na—na ba—sanza oyo. Tozuaki kolamuka te. Ezali komonana lokola bato nyonso bazali koningana te, to likambo moko boye. Tozali bobele kokende na losambo pe koyemba ba-nzembo, pe—pe koyoka mwa mateya pe kozonga.” Kasi na mbala moko, na sima, ntango tobandi kokauka, na tango wana Yesu ayei kobanda mosala, apesi biso mpiko ya sika, amemeli biso eloko moko ya sika. Azalaka ntango nyonso wana mpo na kosala yango. Elikia ya sika eyaka ntango—ntango Yesu akótaka. Bozali na Ye epesaka elikia ya sika.

<sup>47</sup> Ye ayebaki ete Azalaki Liloba na Nzambe oyo emonisami. Asilaki komona eleko yango. To, soki te, alingaki kotikala kozala Orthodoxe. Alingaki kotikala kozala moto na lingomba. Kasi asilaki komona Liloba elakámá. Asilaki komona Liloba elakámá na nzela na Ye kotalisama polele pe ayebaki ete Azalaki Liloba ya bomoi. Pe ntango ayokaki yango, amitungisaki te na bato boni bazalaki kotóngá ye, to likambo nini mosusu, abimaki mpo na koluka Ye, na lombangu nyonso. Bomoni? Ayebaki ete Azalaki Liloba etalisami polele.

<sup>48</sup> Na ntembe te, asiláká kotanga lisoló ya Eliya na eleko na ye. Sikawa, azalaki Liloba na Nzambe etalisami na eleko wana. Azalaki mosakoli, pe Liloba ya Nkolo eyáká na mosakoli. Pe mwasi moko azaláká kuna, oyo azalaki na mwana moke oyo autaki kopesamela ye na nzela na lipamboli oyo mosakoli apesaki ye, pe abotaki mwana.

<sup>49</sup> Mokolo moko, pene na ngonga ya zomi na moko, moi ebetaki ye makasi mpenza. Azalaki na elanga elongo ná tata na ye, Biblia elobi te ete ezalaki bongo, elobi ete moi ebetaki ye makasi, kasi abandaki kolela: “Motó na ngai! Motó na ngai!” Pene na ngonga ya zomi na moko ya moi. Pe ye azalaki na mosali, oyo amemaki mwana na ndako. Atiaki ye na makolo ya mama na ye kino pene na midí, bokono ekobaki kokóma makasi, pe sukasuka akufaki.

<sup>50</sup> Pe sikawa, esika elikia ésila, ye... bazalani nyonso babandaki kolela pe nyonso wana, kasi mama ya molende wana, mwana na ye autaki kokufa, amatisaki ye na esika-ya-kolala



moke, oyo abongisáká mpo na mosakoli, pe alalisaki ye na mbeto na ye, ndenge wana. Pe alobaki na mosali yango: “Bongisela ngai mbalata-mpunda, pe mema yango sémba, pe kotelema te soki nayebisi yo te.” Oh! la la! Ezali yango!

<sup>51</sup> Tozali na ntango ya kobendana pe kowelana te. Eleko wana esilá koleka. Tókende liboso. Tosengeli kokóma kuna. Tozali na bosenga.

<sup>52</sup> Na bongo, alobaki: “Kende liboso, pe kolembisa mbangu te bobele soki napesi yo ndingisa.” Bakendeki kino bakómaki esika ya Eliya.

<sup>53</sup> Eliya, lokola moto na Nzambe, lokola Klisto te; Klisto ayebaki makambo nyonso, mpo Azalaki Nzambe. Eliya azalaki eteni ya Nzambe. Ezalaki Klisto kati na Eliya. Pe yango ezalaki nsango ya eleko wana, mpo Liloba ya Nkolo mpo na eleko wana ezalaki na mosakoli wana.

<sup>54</sup> Yesu azalaki litondi ya basakoli nyonso wana, bango nyonso bazalaki bobele kotalisa Ye. Esili. Bango nyonso, kobanda na Yosefe, longwa na palata ntuku misato ya misolo, bisika nyonso, a—azalaki kotalisa Klisto. Bongo pe na Mose!

<sup>55</sup> Dawidi, efandaki ye likolo na ngomba, lokola mokonzi oyo aboyami, azalaki kolela mpo baboyaki ye. Mibu nkama mwambe sima na yango, Mwana na Dawidi afandaki likolo na ngomba moko. Ezalaki Molimo ya Klisto kati na Dawidi kuna. Pe Ye. . . Oh! la la! Azalaki mbala moko Mosisa pe Mokitani ya Dawidi. Na bongo, Afandaki likolo na ngomba, kolela, lokola Mokonzi oyo aboyami: “Yelusaleme, Yelusaleme, mbala boni Nalingaki koyanganisa bino, ndenge soso-ya-mwasi eyanganisaka bana na yango.” Ezalaki nini? Ezalaki Klisto kuna.

<sup>56</sup> Klisto moto azalaki kolela ntango Dawidi akomaki loyembo: “Nzambe na Ngai, mpo na nini Otiki Ngai? Mikuwa na Ngai nyonso, bango bazali kotala-tala Ngai. Batoboli makolo na Ngai pe maboko na Ngai. Bakaboli bilamba na Ngai kati na bango. Babwaki mbese mpo na bilamba na Ngai.” Ezalaki Klisto koloba kati na Dawidi. Ezali solo. Azalaki komonisama ya Liloba. Klisto ayaki mpo na kokokisa makambo yango oyo basakoli balobáká, mpo Liloba ezalaki elongo na basakoli.

<sup>57</sup> Alobaki yango na liteya ya lobi na mpokwa, ete Ayaki mpo na kokokisa makambo basakoli balobáká mpo na Ye, mpo bazalaki na Liloba. Pe Eliya azalaki mosakoli ya Nzambe, Liloba ya eleko wana.

<sup>58</sup> Na bongo, mwasi Mosuneme wana akangamaki na mosakoli yango kino ntango ayaki kotalisa nguya na Nzambe, amitandaki likolo na mwana yango, pe mwana yango asekwaki.

<sup>59</sup> Sikawa, Malatá asengelaki kososola yango, ata azali na mosala mingi ya kotala makambo ya ndako, kosukola basani pe bongo na bongo. Kasi kuna amitalisaki mpenza polele. Atalisaki

mpenza oyo ezalaki kati na ye. Akendeki kokutana na Ye mbala moko. Soki Nzambe azalaki kati na Eliya, Nzambe asengelaki kozala kati na Klisto, mpo Atalisaki polele ete Ye azalaki Moto yango. Amen. Nasepelaka na yango, molende ya ndenge wana! Akendeki kokutana na Ye. Asengelaki kokóma epai na Ye. Pe amonaki kuna, ntango akómaki epai na Ye—epai na Ye; sikawa bómikanisela, ayebaki ete Abongwanaki ata moke te, ete Nzambe abongolaka mwango na Ye ata moke te. Soki Azalaki kati na Eliya pe Akokaki kosekwisa mokufi, Azalaki kati na Klisto pe Akokaki kosekwisa mokufi, ata Asalaki yango naino te, mpo ezali Nzambe yango moko.

<sup>60</sup> Abongwani pe naino ata moke te! Azali bobele Nzambe yango na mpokwa oyo ndenge Azáláká. Azali motindo moko lobi, lelo pe libela. Abongwanaka te.

<sup>61</sup> Pe Ayebaki ete ye ayebaki ete ezalaki kati na Ye. Bótala malamau, na miníti moke ndenge etalisamaki polele, ntango ayebisaki Ye likambo ya ndeko na ye ya mobali, pe alobaki: “Nkolo, na—nandimi ete ezali Yo.”

<sup>62</sup> Pe Alobaki: “Ngai nazali Lisekwa pe Bomoi. Ata akufi, kasi akozonga na bomoi. Pe moto nyonso azali na bomoi pe andimeli Ngai akokufa te. NAZALI.” Ye nde NAZALI oyo azalaki na nzete epelaka móto, elongo na Mose. “Nazali Lisekwa. Nazali Bomoi. Nazalaki Etutu. Nazali bobele Ye. Nazali Lisekwa pe Bomoi. Ye oyo akondimela Ngai, ata akufi, kasi akozonga na bomoi. Moto nyonso azali na bomoi pe andimeli Ngai, akokufa te.” Sima na kondimisama monene oyo azalaki na yango, ete Azalaki Liloba elakámáká; ntango Alobaki, lokola Mosakoli, Akokaki kokosa te; yango wana Ye, ntango Alobaki: “Nazali oyo NAZALI. Nazali Ye oyo azali Lisekwa pe Bomoi.”

<sup>63</sup> Alobaki: “Nandimi ete Ezali Yo, Mwana na Nzambe oyo asengelaki koya na mokili. Ata ndeko na ngai asili kokufa, azali kuna na nkunda, azali . . . nzoto na ye ezali sikawa kopola; kasi ata sikawa, likambo nyonso Okoloba, ekokokisama.” Ya solo!

<sup>64</sup> Nyonso oyo alingaki, ezalaki koyoka Ye koloba yango! Amen. Oh, Malatá, tokómi wapi na mpokwa oyo? “Loba bobele Liloba; mosali na ngai akobika!” Bobele koyoka Ye koloba bongo! Bakokaki koya koyebisa ye ete Alobaki bongo, kasi Azalaki wana Ye moko. E Nzambe, fungola miso oyo ekúfá, mpo bákoka komona! Ntango Ye, na Bozali na Ye, alobi Liloba, ekokisamaka ntango nyonso.

<sup>65</sup> Alobaki: “Likambo nyonso Okosenga na Nzambe, Nzambe akopesa Yo yango. Lobá bobele koloba mpo náyoka!” Alingaki ete Aloba Liloba. Yango nde nyonso ye alingaki koyoka. Bobele kozua bobele Liloba, yango nde nyonso asengelaki na yango, ezalaki ete áyoka Ye koloba ete Akosala yango.

<sup>66</sup> Pe Akokaki kosala yango mbala moko, kasi, bomoni, na emononeli oyo Tata asilaki kotalisa Ye, Asengelaki kotelema

pembeni na nkunda. Oh! la la! Simba kondima na yo! Nzambe azali kotambwisa makambo nyonso malamumu. Ekozala malamumu. Zela bobele kino ákóma na nkunda.

<sup>67</sup> Bótala, akokaki kosala ete Áloba yango, ata ntango ye azalaki naino. . . Bakomaki na suka, makambo nyonso mpenza. Akufaki, azalaki kopola na kati ya nkunda, kasi bobele koyoka Ye koloba bongo, yango nde nyonso oyo alingaki.

<sup>68</sup> Sikawa ntango Alobaki: “Nazali Lisekwa pe Bomoi,” andimaki yango. Andimaki yango. Sikawa bótala, sikawa, asengelaki kondima makambo makoki kosalema te, ntango ayokaki Ye koloba: “Nazali Lisekwa pe Bomoi. Ata asili kokufa, kasi akozonga na bomoi, pe moto nyonso oyo azali na bomoi pe andimeli Ngai akokufa te.” Alobaki: “Ondimi yango?”

<sup>69</sup> Pe alobaki: “Iyo, Nkolo, nandimi yango. Nandimi ete Ozali Mwana na Nzambe oyo asengelaki koya na mokili.” Nasepelaka na yango. Nasepelaka na yango.

<sup>70</sup> Na—nasílá koloba likambo oyo liboso. Ekoki pe kozala malamumu sikawa. Nazalaki kosolola na mwasi moko, kala mingi te, ezalaki lingomba moko oyo nauti kotánga nkombo na yango, oyo, bandimaka te ete Azalaki Nzambe, Bonzambe na Ye; Azalaki bobele mosakoli, moto lokola bato nyonso.

<sup>71</sup> Azalaki yango, ya solo. Azalaki yango, kobakisa Nzambe. Bomoni, Azalaki kotalisama. Yesu azali nzoto, Mwana mobali, Moto; Nzambe nde azalaki kofanda kati na Ye. Nzambe azalaki kati na Ye. Azalaki Nzambe-moto. Azalaki Moto, kasi Azalaki Nzambe oyo atalisami na mosuni. Ntango tomoni Yesu, tomoni Nzambe. Yango nde Alobaki: “Ntango bomoni Tata, bomoni Ngai, bomoni Tata.” Mpamba te, Azalaki etaliseli, mpo Azalaki Liloba, amen, oyo ezalaki na ebandeli. Amen.

<sup>72</sup> Abengaki basakoli “nzambe”. Boyebi yango? Alobaki: “Bobengaka bango ‘nzambe’, baoyo Liloba na Nzambe eyáka na bango. Ndenge nini bokoki kokweisa Ngai ntango Nalobi: ‘Nazali Mwana na Nzambe?’”

<sup>73</sup> Mpamba te, Liloba yango moko elobaki ete Akozala wana, pe tálá Liloba oyo etalisami lisusu. Kasi ata bongo bazali kondima yango te.

<sup>74</sup> Mwasi yango alobaki na ngai: “Nakoki kotalisa yo yango.” Alobaki: “Nasepelaka koyoka yo koteya, kasi olekisaka ndelo na likambo moko.”

“Ee, likambo nini?”

Alobaki: “Okumisaka Yesu mingi koleka.”

<sup>75</sup> Nalobaki: “Nabanzi ete yango nde likambo nyonso oyo Akotelemela ngai, ntango Akoya.” Pe alobaki. . . Nalobaki: “Nabanzi ete yango nde likambo nyonso oyo Akoki, libunga oyo Akomona kati na ngai.” Nalobaki: “Soki nazalaki na ndémo

nkóto zomi, nakokaki ata koloba te ndenge esengeli, oh! la la! oyo Ye azali!”

Alobaki: “Kasi, yo, okómisaka Ye Nzambe.”

<sup>76</sup> Nalobaki: “Azalaki Nzambe. To, soki Azalaki yango te, Azalaki mopengwisi ya monene koleka, oyo mokili esilá kozua.”

Alobaki: “Azalaki mosakoli.”

<sup>77</sup> Nalobaki: “Azalaki Mosakoli, ezali solo: mosakoli-Nzambe, litondi ya Liloba. Mosakoli azalaki bobele na Liloba oyo eyaki epai na ye, yango nde ekomisi ye—ekomisaki ye mosakoli. Kasi Ye azalaki litondi ya Liloba yango.”

<sup>78</sup> Pe alobaki: “Nakoki kondimisela yo.” Alobaki: “Yo okómisaka Ye Nzambe.”

Nalobaki: “Azalaki Nzambe.”

Pe alobaki: “Akoki kozala Nzambe te.”

Nalobaki: “Ye . . . Kasi Azalaki yango.”

Alobaki: “Olobaki ete ondimaka Biblia.”

Nalobaki: “Iyo.”

<sup>79</sup> Alobaki: “Nakondimisela yo na Biblia na yo moko, ete Azalaki Nzambe te.”

<sup>80</sup> Nalobaki: “Sálá yango. Soki Biblia elobi bongo, na boye, nakondima yango, mpo nandimaka ete Liloba ezali solo.”

<sup>81</sup> Alobaki: “Na nzela ya kokende na nkunda ya Lazálo, oyebi yango, na Santu Yoane 11?”

Nalobaki: “Iyo, nayebi yango malamú, madame.”

<sup>82</sup> Alobaki: “Ee, sikawa, na nzela ya kokende kuna, Alelaki. Biblia elobi: ‘Alelaki.’”

Nalobaki: “Iyo, Biblia elobi ete Alelaki.”

Alobaki: “Ndenge nini Akokaki kozala Nzambe pe kolela?”

Nalobaki: “Azalaki moto.”

“Moto pe Nzambe?”

<sup>83</sup> Nalobaki: “Iyo, madame. Ozangi komona. Azalaki mo—moto, ntango Azalaki kokende kuna, kolela elongo na baoyo bazalaki kolela, ezali solo, koyoka mawa elongo na baoyo bazalaki na mawa. Azalaki Moto. Kasi ntango Asémbolaki mwa nzoto moke na Ye, pe Alobaki: ‘Lazálo, bimá,’ pe moto oyo asilaki kokufa eleki mikolo minei, atelemaki ngwi. Oyo wana esengelaki kozala koleka moto, ezalaki Nzambe kati na Moto.” Nani akoki kosekwa bakufi, soki Nzambe te? Azali Lisekwa pe Bomo! Ezali solo.

<sup>84</sup> Na butu wana, na mai-na-mbu, ntango Azalaki kuna, alembaki pe alalaki na sima ya masuwa, esika milimo mabe nkóto zomi bakánaki kozindisa Ye na mai na butu wana, pe mwa masuwa yango ezalaki kotepatepa kuna lokola litukú ya

molangi, likolo na mai-na-mbu ya mopepe makasi. Milimo yango mabe emilobelaki: “Tozui Ye sikawa. Alali mpongi; tokozindisa bango nyonso.” Oh, Azalaki Moto, alembaki, kasi ntango Alamukaki mbala moko, Atiaki lokolo na libaya ya masuwa, Atombolaki miso pe Alobaki: “Kimia, fanda nye,” pe mipepe ná ba-mbóngé etosaki Ye. Oyo wana ezalaki koleka moto.

<sup>85</sup> Azalaki Moto ntango Ayokaki nzala, akitaki longwa na ngomba, koluka eteni ya lipa to eloko ya kolia, to mowiti na nzete. Kasi ntango Azuaki mapa mike mitano ná mbisi mibale, pe aleisaki bato nkóto mitano, oyo wana ezalaki Nzambe kati na Moto yango. Ezali solo.

<sup>86</sup> Oh, moto nyonso oyo asilá kokoma eloko mpamba andimaki yango, bayembi nyonso bandimaki yango. Kokamwa te ete moto moko akomaki:

Na bomoi, Alingaki ngai; na kufa, Abikisaki  
ngai;  
Na bokundami, Amemaki masumu na ngai  
mosika;  
Na lisekwa, Alongisaki ngai ofelé libela;  
Mokolo moko Akozonga, O mokolo ya nkembo!

<sup>87</sup> Eddie Perronet, oyo ba-nzembo na ye ezalaki kotekama te. Mokolo moko, wana azalaki kotengatenga na nguya ya Molimo Mosantu, azuaki ekomeli, akomaki loyembo ya ebandeli, ntango akomaki:

Banso bóbélela nguya ya Nkombo na Yesu!  
Tika ete Banje bákumbamela Ye;  
Bóya na motóle ya bokonzi,  
Bólatisa Ye motóle lokola Nkolo ya banso!  
(Aleluya!)

<sup>88</sup> Ya solo, yango nde biso tondimaka Ye azalaki. Iyo, misie.

<sup>89</sup> Asengelaki kondima makambo-makoki-kosalema-te sikawa, kokokana na makanisi ya eleko wana. Ndenge moko pe, bosengeli kondima makambo-makoki-kosalema-te, mpo na komona Bomoi ya sika, mpo na komona likambo kosalema. Kasi soki Asosolaki. . . Asosolaki ete Ye azali Liloba, bongo nde makambo-makoki-kosalema-te ekoki kosalema, mpo Azali Mokeli, pe Akokokisa makambo nyonso oyo Alobáki.

<sup>90</sup> “Pe makambo nyonso ekoki kosalema na baoyo bakoki kondima.” Ezali Liloba na Ye. Kasi makambo-makoki-kosalema-te emonisamaka polele ntango moto akangi Nzambe na Liloba na Ye. Iyo, misie. Ntango moto akangi Nzambe na Liloba na Ye, makambo makoki-kosalema-te e—ekomonisama polele. Ntango Nzambe alobi ete ekosálema, bongo, kangáma na Liloba yango pe okomona likambo, makambo-makoki-kosalema-te ekosalema. Na ntembe te, ekosalema.

<sup>91</sup> Kasi bótala, ata na nyonso wana, alobaki: “Ata sikawa, Nkolo, likambo nyonso Okosenga na Nzambe, Nzambe akosala yango.” Ayebaki ete akokaki mpenza kozua Liloba yango kobima na monoko na Ye. Yango nde nyonso oyo asengelaki kosala, ezalaki ete ázua Liloba yango. Iyo, ezalaki ntango na ye ya molili koleka, pe Yesu ayaki pe abengaki. Oh, likambo nini bamonaki, lisekwa!

Tótala makambo mosusu esika ba-ntango ya molili eyaki.

<sup>92</sup> Ezalaki na moto moko na ntango moko, nkombo na ye Yobo, moko na basakoli ya kala mpenza na Biblia. Azalaki moto monene. Azalaki—azalaki kolinga Yawe, pe azalaki kosala nyonso oyo akokaki kosala. Kasi Satana alingaki kopupola ye, na bongo, mokolo moko, alobaki na Nzambe. . . Iyo, Nzambe nde alobaki na ye: “Outi wapi, Satana?”

<sup>93</sup> Alobaki: “Oh, kotambola-tambola na mokili.”

<sup>94</sup> Alobaki: “Okanisi na motema na yo likambo ya mosali na Ngai Yobo? Na mokili, moto lokola ye azali te. Azali malamumu be.”

<sup>95</sup> “Oh,” alobaki, “ya solo, Osili kopesa ye biloko nyonso, Osaleli ye makambo nyonso. Na ntembe te, azali moto monene. Kasi pesa ngai ye naino, nakobongola makambo. Nakosala ete álakela Yo mabe, na miso na Yo.”

<sup>96</sup> Alobaki: “Okokoka kosala yango te.” Atiaka motema na Ye na mondimi. Mpo na nini? Azangi Suka. Azali Seko. Ayebi suka longwa ebandeli. Ayebaki ete Satana akokoka kosala yango te. Mpamba te, Azali Liloba, Ayebaki likambo nini Yobo akosala.

<sup>97</sup> Sikawa, bómikanisela, Yobo, abwakelaki ye bokono ya babibó, abomaki bana na ye, abebisaki biloko na ye nyonso. Azalaki lisusu na nzoto kolongono te. Ata ntango bato ya kobóndisa ye bayáki, bakokaki kosala eloko mosusu te bobele kokosela ye na koloba ete azalaki mosúmuki na nkúngu. Pe mobange Yobo akómaki mpenza na esika oyo azángáki mpenza elikia.

<sup>98</sup> Osengeli liboso kokóma kozángá elikia. Osengeli kokóma na ntango moko oyo okómi na suka ya nzela.

<sup>99</sup> Yobo akómaki na suka ya nzela, ntango alobaki: “Tika été mokolo nabotamaki élakelama mabe. Tika ete mói éngenga ata te, pe tika ete sánza éngenga te na butu yango, tika ete nkombo na yango étángama ata moke te.” Pe kati na kozángá elikia wana nde Yesu ayaki. Akitisaki miso na nse, pe alobaki: “Namoni moto, soki felele ekufi, esékwaka na ntango na mbula pe mói. Soki nzete ekweisami, etélemaka lisusu na nsolo ya mai.” Amonaki ndenge milóna ezóngaka na bomoi, kasi alobaki: “Soki moto aláli, akáti motema, azalaka wapi?” Ayebaki ete azalaki mobange. Alobaki: “Bana na ye mibali bakoya kolela ye, kasi akomona yango te. Oh, tika été Óbomba ngai na nkunda pe Óbatela ngai na esika ya nkukú, kino nkanda na Yo ekoleka.

Tiela ngai ntango pe katela ngai ntango. Tokendeki...” Pe akobaki bongo, koloba bongo. Akómaki na suka, ya kozanga elikia na ye: “Likambo nini ekosalema? Nkasa ezalaka na bomoi, ezongaka na ba-nzete, ba-feléle ezongaka, biloko mosusu nyonso ebimaka, kasi moto alali pe akati motema!” Azangaki elika. Ayebaki te likambo nini ekoki kokómela ye, wana akómaki na mibu wana.

<sup>100</sup> Na ntango wana, Yesu ayaki. Nzambe atalisaki ye likolo, pe amonaki Yesu azali koya na mikolo ya suka.

<sup>101</sup> Na ntango ya molili koleka oyo mwasi na ye alobaki: “Lakéla Nzambe mabe pe kúfá na yo,” kasi alobaki: “Mwasi, ozali koloba lokola mwasi ya élémá. Yawe apesaki, pe Yawe abótoli, Nkombo na Yawe ékumisama.” Ata mwasi na ye aboyaki ye. Lingomba na ye eboyaki ye. Bato nyonso baboyaki ye.

<sup>102</sup> Na ntango yango ya molili, oyo ayebaki te esika autaki, Yesu ayaki. Na bongo, agangaki: “Nayebi ete Mosikoli na ngai azali na bomoi, pe na mikolo ya suka, Akotelema na mputulu. Pe ata nkusú ya loposo na ngai ekosila kobebisa nzoto oyo, kasi, na mosuni na ngai, nakomona Nzambe, Oyo ngai moko pe nakomona.” Na ntango na ye ya molili koleka, nde Yesu ayaki. Iyo, misie.

<sup>103</sup> Mose, mpo na Mose, ntango ya molili koleka ekómelaki ye na Yisalaele. Azalaki mpenza na molongo ya kosala mosala na ye; akutanaki na Nzambe kuna, na esóbé, pe alobaki: “NAZALI OYO NAZALI.” Akendeki pe abundisamaki na lolenge nyonso ya komekola ya Yáne ná Yambéle, oyo bazalaki koluka komekola mosala na ye. Na nyonso wana, atikalaki sembo na Nzambe. Sukasuka, andimisaki Yisalaele. Pe awa abimaki na Ezipito, kokende na—na mboka ya elaka, esika Nzambe alobaki: “Bokokumbamela Ngai na ngomba oyo.” Yango nde ezalaki Liloba na Nzambe. Mose ayebaki ete asengelaki kokende na ngomba yango. Amen. Nzambe alobaki bongo! Fálo moko te akoki koboma ye. Molimo mabe moko te ekoki koboma ye. Eloko moko te ekoki koboma ye. Azali koya na ngomba yango. Amen! Aleluya! Namiyoki lokola mosambeli. Azali kokende na ngomba yango.

<sup>104</sup> Biso pe tozali kokende na Nkembo! Eloko moko te ekopekisa biso. Te, misie. Nzambe akotatola Liloba na Ye. Ata likambo nini ekosalema, Akosala yango, ata ndenge nini. Iyo.

<sup>105</sup> Na nzela na ye, na nzela ya mosala. Ye oyo, azingami katikati na ba-ngomba. Ayoki mpenza makelele sima na ye. Ezali nini? Makálo ya Fálo, nkóto na nkóto, ezalaki koya; ná bibundeli, pe makongá ná biloko mosusu, mpo na koniata bango pe kofina bango na nse. Mai-na-mbu Motane yango wana, ekangaki ye nzela. Asalaki nini? Akómaki na ma-... Akómaki na kozanga elikia. Bato nyonso bazalaki koganga: “Oh, tobebi na biso

sikawa. Fálo akoboma biso, mipanga na bango ekotobola biso. Bana na biso bakokufa awa na biliki.”

Mose abélélaki: “E Nzambe!”

<sup>106</sup> Na sima, Yesu akotaki na mosala. Azalaki Likonzi na Mótó. Ezali solo. Akitaki pe Atelemaki katikati na ye ná likama. Amen. Azalaka Katikati na biso. Atelemaka Katikati, amen, Molobeli. Kuna nde Atelemaki, atelemaki wana; molili ngámbo na ba-Ezipito, baoyo bazalaki koya koluka kosala likambo mpo na yango. Azalaki Pole na bango mpo batambola na yango. Boye, na ntongo, ntango mopepe ebandaki kopepa makasi mpenza, na butu wana, na ntango wana, Asalaki nini? Asilaki koya na lolenge ya Likonzi na Mótó.

<sup>107</sup> Bómikanisela, Azalaka ntango nyonso Likonzi na Mótó yango. Iyo, misie. Ntango Azalaki na mokili, Alobaki: “Nauti na Nzambe, pe Nakei na Nzambe.”

<sup>108</sup> Pe sima na liwa, kokundama, lisekwa pe konetolama na Ye; Santu Polo, na nzela ya Damaseke, Likonzi na Mótó yango ekweisaki ye na nse. Bómikanisela, azalaki Moebéle. Alingaki koloba te ete. . . Alobaki: “Nkolo, Yo Nani?” Na monene N-k-o-l-o, Elohim. “Yo Nani, oyo nazali konyokola?”

Alobaki: “Nazali Yesu.”

<sup>109</sup> Amen! Aleluya! Azali Moto ya liboso pe Moto ya suka. Azali bobele motindo moko. “Sima na ntango moke, pe mokili ekomona Ngai lisusu te, kasi bino bokomona Ngai. Nakozala elongo na bino, pe kati na bino.” Likonzi na Mótó yango moko, Nzambe yango moko oyo akosala likambo yango moko, ná elaka yango moko, amen, Azali kotalisa Liloba na Ye polele. “Nazali Lisekwa pe Bomoi. Nazali Ye oyo Azalaki, Ye oyo Azali pe Ye oyo Akoya.” Iyo, misie. Iyo.

“Batata na biso baliaki mána na biliki.”

<sup>110</sup> Alobaki: “Bango nyonso bakúfáki. Kasi, NAZALI YE OYO NAZALI.” Mose. . . Na nzete ezali-kopela-mótó, ezalaki NAZALI. Azali bobele NAZALI, Nazalaki te; NAZALI, eleko bébe, ntango nyonso.

<sup>111</sup> Tomoni awa ete Mose akakemaki na litumu oyo, pe Klisto asilaki kokita. Sikawa, Biblia elobaki yango, ete: “Mose amonaki ete—ete nsoni ya Klisto ezali bozwi mingi koleka biloko ya motuya ya Ezipito.” Nsoni ya Klisto! Klisto azalaki Epakolami, Logos oyo ebimáki longwa na Nzambe. Mwanje, motángi nyonso ya Biblia ayebi ete Mwanje yango ezalaki Klisto. Pe Azalaki kuna na biliki, pe Akotaki na mosala, na lolenge oyo Asengelaki kotalisama na yango. Nkembo na Nzambe!

<sup>112</sup> Ayei lelo na lolenge yango, Klisto yango moko, kotalisama polele.

<sup>113</sup> Ayebisáká bango ete Akobimisa bango. Azalaki kosala yango. Ayaki wana mpo na kokokisa Liloba na Ye, mpo na



kotatola Yango. Na bongo, sima na Ye koya, ndenge Asalaki na Malatá, na sima Abengaki. Alobaki: “Mose, mpo na nini ozali kobéléla Ngai? Lobá na bato oyo, ete bókende liboso.” Na ngonga ya molili wana, Mbu Motane efungwamaki pe bakatisaki, kokóba na mobembo na bango mpo na kokokisa Liloba na Nzambe. Iyo, na ngonga ya molili koleka ya Mose, nde Yesu ayaki. Tokomi na ntango sikawa. . . Pe Abengaki Mose.

<sup>114</sup> Tolingi kobenda bokebi na bino na moto moke mosusu. Nkombo na ye Yailo. Ezali na mingi na bango mpenza na mokili lelo. Azalaki mondimi ya kobómbama. Alingaki Yesu. Asiláki koyoka nsango na Ye. Andimelaki Ye. Kasi, bomoni, asilaki komikotisa na ebongiseli moko. Iyo. A—a—a—a. . . Akokaki kotalisa yango polele te. Andimaki yango, kasi akokaki kotatola yango te, na bongo asilaki kosangana na bazangi kondima. Kasi ye andimaki yango mpenza.

<sup>115</sup> Boyebi, soki moto akómi na lolenge wana, ntango mosusu Nzambe amemaka ye na kosukisa likambo. Ezali na ntango ya kozanga elikia nde totalisaka mpenza lolenge na biso, eloko nini tozalaka mpenza.

<sup>116</sup> Na bongo, ye wana, asilaki kosangana na bazangi kondima, pe asilaki kokende kokomisa nkombo na ye na buku, pe bongo na bongo. Pe azalaki nganganzambe, na bongo, e—ezalaki mpasi mpenza mpo na kotatola polele, mpo yango nde ezalaki koleisa ye. Kasi, ata bongo, akobaki kondimela Yesu.

<sup>117</sup> Mokolo moko, mwana na ye ya mwasi abelaki. Oh! la la! Ye, na ntembe te, moto yango, soki a. . . ndenge wana, asilaki kobénga monganga. Monganga ayaki, asalisaki mwana yango. Móto na nzoto na ye ekóbaki kokóma makasi. Sima na ntango moke, akómaki na móto mingi mpenza, pe nyonso wana, sukasuka akómaki pene na liwa. Akómaki na suka ya elikia. Asengelaki kosala likambo moko. A—ayebaki mpenza likambo ya kosala te. Sikawa, amilobelaki: “Soki nakoki bobele komona Ye, ata Azali wapi.” Sikawa azelaki ata moke te ete butu éyinda, lokala Nicodeme, mpo básolola bobele bango mibale. Ntango ekómaki ya kosala likambo, ekómaki ntango ya kosala likambo, pe asengelaki kosala yango mbala moko.

<sup>118</sup> Pe, ndeko mobali, ndeko mwasi, nakanisi ete ezali ndenge moko sikawa. Ntango ya kosala likambo ekoki. Ekomi ntango ya kondima to kozanga kondima. Ndelo ya kokabwana ekómelaka mobali pe mwasi nyonso. Ekómelaka mwana nyonso. Mbala mosusu ntango okokatisa ndelo yango, ekotikala bobele eloko moko, ezali kosambisama, ntango okomi kokatisa katikati na mawa ná kosambisama, ntango okatisi ndelo yango.

<sup>119</sup> Bomikanisela, azángaki elikia. Ayebaki likambo ya kosala te. Ba-nganganzambe na ye bazalaki wana, ba-labí nyonso bazalaki zonga-zonga na ye. Bandedo ya lisanga bazalaki elongo na ye, bango nyonso bazalaki wana, kotala ndenge mwana na

ye ya mwasi azalaki kobunda na liwa. Monganga atelemaki na libanda, azingaki maboko na ye, koningisa maboko na ye: “Napesi ye nkisi nyonso oyo nakokaki kopesa, kasi . . .”

<sup>120</sup> Bomoni, ezalaki Yesu nde azalaki kosala ntango nyonso wana. Yesu azalaki kosala yango na ntina moko, mpo na kotalisa polele nini ezalaki kati na moto wana. Sima na ntango moke, nakoki komona ndenge akendeki kozua mwa ekoti na ye ya moindo pe alataki yango, alataki mwa kazaka na ye ya nganganzambe.

“Okei wapi?”

<sup>121</sup> “Nazali . . . Nayokaki ete Azali kuna na ebale. Nakei koluka Ye!” Oh! la la! Asimbi nzela, akei!

<sup>122</sup> Na ntango wana ya kozanga elikia, asengelaki kozua mokano: kotika mwana na ye kokufa, to ayebaki ete kotalisama ya Liloba ezalaki. Azalaki nganganzambe, asilaki kotánga Liloba, pe ayebaki ete oyo wana ezalaki kotalisama ya Nzambe. Nzambe azalaki kati na Klisto, kozongisa mokili na boyokani ná Ye moko. Ayebaki yango, pe atindamaki kondima likambo yango. Asengelaki kosala libunga, kotika mwana na ye kokufa, to kotatola polele. Ntango akómaki na kozanga elikia yango, ezalaki na ntango wana mpenza nde Yesu ayaki. Akendeki kokutana na Ye. Alobaki, alobaki: “Nakolanda Yo, na makambo nyonso Okoloba.” Pe na nzela, moto moko ayaki na lombangu, likambo ya molili wana. Asilaki kotatola polele ete andimelaki Ye. Na ntango wana, asilaki komibwakama libanda, pe komitalisa na miso ya bato nyonso, ete azalaki mondimi ya Yesu.

<sup>123</sup> Pe moto oyo ayaki mbangu alobaki: “Kotungisa moto moko te, mpo mwana na yo ya mwasi asili kokufa. Akufaki lobi. Asili kokufa. Te, komitungisa lisusu mpo na yango te.”

<sup>124</sup> Pe, oh, mwa motema na ye elingaki kokangama. Kasi atalaki pe amonaki miso ya Yesu, alobaki: “Nayebisaki yo yango te? Kobanga te, soki olingi komona nkembo ya Nzambe. Ozali kobanga nini? Nasilaki koyebisa yo ete Nakokende.”

<sup>125</sup> Asilaki koloba ete Akoya. Asilaki koloba ete akosala likambo oyo, pe Ye oyo, Azali kosala yango. Amen. Alobaki ete Akokota na mosala na ntango ya suka pe Akosala makambo oyo, ndenge Asalaki, ndenge totángaki pe tolobelaki yango lobi na mpokwa. Ye oyo, Azali kosala yango. Bozali kobanga nini?

<sup>126</sup> Bómikanisela, ntango Ayaki, Abengaki ye longwa na bakufi. Akotaki na mosala pe Abengaki ye longwa na bakufi.

Mokolo moko, mobange mokufi miso, Balatimai, akómaki na ntango na ye ya molili koleka.

<sup>127</sup> Yesu akendeki wana, babongisaki bilei-ya-ntongo ya Bato na Mombongo ya Litondi ya Nsango-malamu, kuna na—na Yeliko, pe Azalaki ná Zakai kuna. Asiláki kokutana na ye na nzete, na

balabala. Bongo, ntango Azalaki . . . Ee, nandimi ete Abongisaki makambo mosusu te. Bomoni? Na bongo, ntango Akómaki kuna, A—Azalaki ná ye, Zakai akendeki elongo na Ye.

<sup>128</sup> Mobange mokufi miso, Balatimai, azaláká mokufi miso longwa bomwana. Na bongo amilobelaki ete Yesu akokaki kobimela na ekuke wana, pe azalaki kozela. Sima na ntango moke, ayokaki makeléle makasi, pe bato nyonso bazalaki koleka.

<sup>129</sup> Pe ayokaki nganganzambe koloba: “Hé! Hé, yo, yo moto ozali komata ngomba kuna! O—o—o . . . Toyokaki ete osekwisaka bakufi. Tozali na malíta mobimba oyo etondi na bango awa. Soki ozali Masiya, soki ozali Masiya, yaka kosekwisa bakufi yango.”

<sup>130</sup> Boyebi, molimo mabe yango moko ezali naino na bomoi, bomoni, na lolenge ya losambo, ndenge moko. Bomoni?

<sup>131</sup> “Soki ozali Masiya, biso . . . sékwisa bakufi; tozali na malíta oyo etondi na bango awa. Yaka.” Pe, oh, bato nyonso bazalaki koganga. Moko azalaki koganga: “Ozana na Mosakoli!” Mosusu azalaki koganga *boye* na *boye* to *boye*. Mobulu mpenza!

<sup>132</sup> Mobange mokufi miso wana azalaki komilobela: “Oh, nazangaki Ye. Abimeli kuna, ngai nakanisaki ete Akoleka awa. Batiaki ngai esika oyo esengeli te.” Pe abandaki koganga. Amilobelaki: “Soki Azali Liloba, Azali Nzambe; Asengeli kozala yango.” Na bongo: “E Yesu, Yo Mwana na Dawidi, yokela ngai mawa!” Na ntango wana ya kozanga elikia, abélélaki.

<sup>133</sup> Sikawa, soki bolingi kokoma yango, awa, Yesu azalaki na Yeliko. Esika balobi ete afandaki, azalaki na ntaka ya metre mokama na ntuku minei, longwa na esika Yesu azalaki. Bato nkóto na nkóto bazalaki kolanda Ye, pe Akokaki koyoka koganga ya moto wana te. Te. Kasi esimbaki Ye. Atelemaki.

<sup>134</sup> Moko na ba-mpokwa oyo, nakolinga koteya: “Na sima, Yesu atelemaki.” Oh! “Na sima, Yesu agumbamaki.” Oh!

<sup>135</sup> Kasi ntango Yesu atelemaki, ezalaki nini? Abengaki ye. “Motei asili koya. Kolemba nzoto te,” bayekoli balobaki, “Abengi yo. Azali kobenga yo.” Abengaki ye katikati na bato nyonso wana.

Azali kosala ndenge moko sikawa. Ezali kokota? Bomoni?

<sup>136</sup> “Motei ayei pe Abengi yo.” Pe Azali kobenga longwa—longwa na bokufi miso kino na pole, longwa na molili kino na pole. Pe Abengaki ye, alongwaki na kufa kino na Bomoi. “Motei ayei pe Abengi yo.” Pe ntango Abengaki ye, Azongiselaki ye komona na ye.

<sup>137</sup> Mokolo moko, likolo na ngomba, mwasi oyo azalaki na kotanga ya makila asilisaki mbongo na ye nyonso, na minganga. Ye, na ntembe te, basilaki koteka ba—ba-ngombe. Basilaki koteka bi—bilanga, basilaki kopesa yango na niongo. Basilaki kofuta nyonso bakokaki kofuta na minganga, ata moko bango

te asungaki ye. Bokono na ye ezalaki ntango nyonso kokóma makasi. Makila ezalaki kokatana te. Ezalaki ntango nyonso kokóba, azalaki kokóba kobéla makasi koleka.

<sup>138</sup> Pe Mokolo moko, wana afandaki pe azalaki kolita tilikó, kuna likolo na ngomba, esika azalaki kofanda, abwakaki miso na lobwaku, pe amonaki masuwa moko. Bato nyonso babandaki kopota mbangu: “Ozana na Mosakoli!”

<sup>139</sup> Asiláká koyoka nsango na Ye. Kondima eutaka na koyoka. Sikawa, alobaki: “Nakokende kotala Ye.”

<sup>140</sup> Pe ntango akómaki kuna, amonaki, mbala ya liboso, Liloba na Nzambe kotalisama polele na nzoto, elobeli na Ye pe lolenge na Ye ezalaki ndenge mosusu, kino asosolaki ete ezalaki Ye. Iyo, misie. “Oh, soki nakoki bobele kobenda bokebi na Ye na lolenge moko, soki nakoki bobele kosimba Ye na lolenge moko!” Pe amikotisaki katikati na bato pe asimbacki elamba na Ye.

<sup>141</sup> Sikawa bomikanisela, ezalaki mosapi na ye te nde Ye ayokaki. Te, misie, mpo bilamba ya bato ya Palestine ezalaka minene mingi. Pe Ye . . . bango ba- . . .

Petelo alobaki: “Bato nyonso basili kosimba Yo.”

<sup>142</sup> Alobaki: “Kasi oyo ezali kosimba ya ndenge mosusu. Namoni ete Nalembi.”

<sup>143</sup> Yesu asilaki koya. Mbongo na ye esilaki, nyonso esilaki; kasi na ntango ya molili, wana makila ezalaki kokatana te, pe minganga bakokaki kotelemisa yango te, Yesu ayaki. Pe Asalaki nini? Abengaki ye. Atambwisaki miso, kino Amonaki ye, pe Alobaki: “Ozalaki kotanga makila, kasi ekatani.”

<sup>144</sup> “Azali motindo moko lobi, lelo pe libela.” “Motei ayei pe Abengi yo. Ayaki pe Abengaki.” Abengaki ye kozonga na nzoto kolongono.

<sup>145</sup> Mwasi oyo azalaki na libulu ya mai, oyo tolobelaki lobi na mpokwa, elikia nyonso esilaki. Ntango mosusu, ekoki kozala ete mobali na ye ya mitano asilaki kotika ye, pe autaki kozua oyo ya motoba na butu wana, pe a—azalaki na mwa ntembe mpo na ye. Bomoto na ye esilaki nye. Azalaki na mposa ya kozala mwasi mpenza; ye, na ntembe te, azaláká kotánga Biblia.

<sup>146</sup> Pe azalaki kotambola-tambola kuna, na ba-ngonga ya zomi na moko. Akokaki koya na ntongo-ntongo te, ntango basi ya malamumu bayaka. Pe bazalaki komema mbeki ya mai na motó, mpo na kozonga. Na bongo, ye akokaki koya kosangana na bango te. Bango, bazalaki na bokabwani yango na eleko wana, malamumu ná mabe ezalaki kosangana te. Baoyo ya bomoi mabe bazalaki kotikala bisika na bango, bongo ye akokaki koyá elongo na bamosusu te. Balingaki kotika ye koyá te. Bongo, sima na bango nyonso kotóka mai na bango pe kozonga. . . Ye ayaki mpo na Oyo ya malamumu koleka.

147 Na bongo, akómaki kuna, ná mbeki na ye na motó, na ntembe te, azalaki kotambola-tambola, komilobela: “Sikawa, mobali oyo nauti kobala, to, oyo nauti kozua lobi na mpokwa, nayebi ye malamuru te. Azali mobali, azali kosala makambo ya ndenge mpenza. Na—nayebi ye mpenza te. Nazui libaku malamuru te. Bato bazali koboya ngai kati na bango. Pe nakoki kokende na mangomba wana te, bako . . . Tala naino bango! Nayebi likambo ya kosala te. Nakómi na suka. Pe nazaláki kotanga Biblia; na ntembe te, mokolo moko, Mosakoli wana akokota na mosala. Sikawa nayebi ete balobaka ete likambo ya bongo ezalaka te, pe ezalaka bongo: ‘Ntango mosusu na mibu mokama, pe na mibu nkóto. Tosila kozela yango kobanda mibu nkóto na nkóto, kasi ekokisami naino ata moke te, na bongo, tozali lisusu kozela yango sikawa te.’ Makambo nyonso ekómi bongo: ‘Oh, te, tozali na mangomba pe nyonso wana. Tozali na ntina moko te ya makambo ya ndenge wana sikawa.’” Na bongo, azalaki kotambola-tambola kuna pe kokanisa.

148 Boyebi, ntango ozali kokanisa Ye, ezali na ntango wana nde Akomimonisa na yo. Ndenge tolobaki lobi na mpokwa, ntango bazalaki na nzela kokende na Emau.

149 Ntango azalaki kokanisa makambo yango, ayokaki Moto moko koloba: “Meméla Ngai mai ya komela.”

150 Likambo nini oyo? Na ntango na ye ya molili koleka, ntango bomoto na ye esilaki nye. Ntango mosusu azalaki elenge mwasi moko kitoko, oyo abwakamaki na balabala mpo na kobika bongo. Mbala mosusu ezalaka libunga ya mwana mwasi te, ezali nde libunga ya baboti na ye, mpo na kotika ye kobima ndenge wana. Pe ye wana, ntango mosusu mwa suki na ye elíngamá, ezalaki kokita; alembaki nzoto, azalaki kotambola, na bolembu, pe moto moko te azalaki na ntina na ye, na bomwana, pe ntango mosusu ezalaki na makambo mingi sima na yango.

151 Ata bongo, nayebi likambo moko, azaláká kotánga Biblia, pe azalaki kondima Biblia. Pe ezalaki na mwa momboto moko kati na motema na ye, koloba: “Soki likambo yango esalemi, nakoyeba yango.” Abongisamáká liboso mpo na yango.

152 Bótala moto oyo Yudasi ndenge azalaki kuna, pe asalaki makambo oyo asalaki. Molili makasi ezalaki na nse ya motema na ye. Pole ezalaki kongenga awa, na misala na ye, kasi na nse ya motema na ye, azalaki kondima Yango te. Kasi ye azalaki . . . Bomoni, Pole ekokaki kokóma kuna te. Kasi oyo wana, andimi, andimaki Yango, kasi bomoi na ye ezalaki na molili; ntango Pole ebetaki, Elongolaki molili. Kasi ntango Pole ebetaki oyo kuna, Eyindisaki yango na mobimba. Yango wana nde bokeseni.

153 Bomoni, ye abotamaki na ntina wana. Ye, alobaki, ntango Ayebisaki ye motángo ya mibali boni azalaki na yango, ye . . . Likambo nini esalemaki? Mbala moko, eningisaki ye mpenza.

Akomaki na suka. Alobaki: “Misie, namoni ete Ozali Mosakoli. Nayebi ete ntango Masiya akoya, Akosala makambo oyo.”

<sup>154</sup> Na sima, Abengaki ye. Na sima, Abengaki ye. “Nazali Ye, Ye oyo azali koloba na yo.” Asosolaki yango na nzela na Liloba na Nzambe. Abengaki ye longwa na masumu na ye, kino na Bomoi. Pe nkombo na ye ekomami na Biblia, pe lelo, azali na Bomoi ekufaka te.

<sup>155</sup> Akoki kobenga yo ndenge moko, mpo Azali motindo moko lobi, lelo pe libela. Ba . . .

<sup>156</sup> Iyo, bomoto na ye ebebaki nye, kasi ata bongo, ayebaki ete Azalaki na lisosoli yango. Ayebaki ete oyo wana esengelaki kozala Masiya. Na sima, ntango Yesu alobaki: “Nazali Ye, Nazali Ye,” ayebaki ezalaki yango.

<sup>157</sup> Mokolo moko, ntango bayekoli bazalaki na masuwa, elikia nyonso esilaki. Mipepe makasi, bakendeki mosika kozanga Yesu, pe mipepe makasi ezalaki mpenza—mpenza ndenge esalemaki na ndako ya Lazálo. Elikia nyonso esilaki. Mwa masuwa yango etondaki na mai. Pe bazalaki koganga pe kolela, pe ntango mosusu bazalaki kobondela pe bongo na bongo, pe mikalikali ezalaki kongenga, pe masuwa etondaki na mai, makonzi na yango ezalaki kokweya, ba-nkáí ezalaki kobukana, pe bazalaki kosimbana moko na mosusu, koleláka.

<sup>158</sup> Pe na ntango wana ya molili koleka, nde Yesu ayaki, azali kotambola wana. Kasi Azalaki lokola elilingi mpo na bango. Azalaki lokola eloko ya kobangisa, lokola elima, pe bagangaki na nsomo.

<sup>159</sup> Yango nde likambo ya lelo. Yesu ayei na ntango na bino ya molili, kasi bozali kobanga Yango. Boyebi te likambo nini Yango ezali.

<sup>160</sup> Bayebaki te nani Ye azalaki. Balobaki: “Oh, ezali elima!” Bazalaki koganga makasi.

<sup>161</sup> Na sima Abengaki bango, Alobaki: “Bóbanga te, ezali Ngai.” Na ntango ya molili koleka, Yesu ayaki, Lisungi na bango. Asalaka ntango nyonso bongo, Ayaka na ntango ya molili koleka. Na bongo Yesu ayaki komitalisa Ye moko, pe ayaki epai na bango.

Petelo alobaki: “Soki ezali Yo, lobá ete náya likolo na mai.”

Yesu alobaki: “Yáka.”

<sup>162</sup> Boyebi nini, baninga na ngai? Kala mingi te, Akoya mpo na baoyo ya mikolo oyo ya suka. Sikawa, ezali kokamwisa ndenge lingomba ekómi lisusu na ngonga oyo ya molili, boye te?

<sup>163</sup> Nakoloba likambo moko awa. Ezali malakisi te. Nazali bobele kosakola. Boyebi likambo nini esalemaki? Ekokóma esika moko, kala mingi te, bókoma maloba na ngai, oyo bibongiseli nyonso ekosengela kokota na Lisanga ya Mangomba. Soki te,

bakokoka kozua lisungi ya Lisanga yango te. Yango wana, ekozala na kopekisama moko, pe moto moko akokoka kokende na mangomba yango, to kokende na lingomba moko; bobele soki ozali na elembo ya lingomba na bino moko, okokoka kosomba to koteka te. Bomoni yango, bobele ndenge ezaláká, ekosalema lisusu bongo, elembo na nyama. Pe lingomba, bazali kososola yango, bato ya molimo.

<sup>164</sup> Pe bino ba-Pantekotiste, ata ndenge nini, bozali kososola yango. Bobandi koyoka yango. Ntango mangomba na bino, bibongiseli mingi ya ba-Pantekotiste; nakotángá ba-nkombo na bino te, kasi boyebi sikawa ete bazali—bazali kokota kati na yango. Basili kotatola ete basilaki kokota. Pe ntango bosali bongo, bokosengela kosala nini? Ekosengela na bino kotika malakisi na bino ya Nsango—malamu ya libatizi ya Molimo Mosantu. Ekosengela na bino kotika malakisi na bino ya Biblia.

<sup>165</sup> Pe bandimi bakozua ngámbo ya likambo yango te. Baklisto ya solo, oyo babótámi mbala ya mibale, bakokufa, liboso. Basíli kokebisama na Liloba. Bayebi ete likambo yango ezali koya. Iyo, misie.

<sup>166</sup> Pe ezali likambo ya kokamwa, boye te? Pe kati na ntango ya molili koleka oyo, nde Yesu ayei kobenga bango, Alobi: “Bóbanga te. Ezali Ngai. Nazali na bino ntango nyonso. Nayezi awa kotalisa polele Liloba na Ngai.” Ndenge Azalaki na eleko wana, Azali pe bongo sikawa. Alobaki ete Akosala yango. Oh! la la! Motei asili koya pe abengi biso.

<sup>167</sup> Babéli mingi bazali awa, na ntembe te, oyo bafandi awa, pe monganga asili koloba na bino ete mpo na bino, elikia ata moke—ata moke ezali te. Bokoki kozala na ntango na bino ya molili koleka, kasi, bómikanisela, Motei asili koya pe Abengi bino.

<sup>168</sup> Pe mokolo moko, mokolo moko, Motei akoya pe akobenga nkombo nyonso oyo ekomami na Buku ya Bomoí ya Mwana-mpate. Soki nkombo na yo ezali kuna te, komísá yango kuna sikawa, mpo Akoya pe Akobenga. Ata baoyo bazali na nkunda bakoyoka Mongongo na Ye pe bakozonga na Bomoí. Motei akoya pe akobenga bino. Pe wana Azali kobenga lelo, bóyanola pe bómilengela mpo na Mokolo yango, yango nde tolí na ngai mpo na bino.

<sup>169</sup> Elaka ya eleko oyo, Alakaki ete Akozala awa. Makambo oyo Asalaki, Akosala yango lisusu, pe lelo lisusu Motei asili koya pe azali kobenga yo.

<sup>170</sup> Tógumba mitó na biso. Natikali na nkasa koleka pene na motoba awa, kasi na—nakoki kolobela yango sikawa te. Tógumba mitó na biso. Nalakaki kotika bino kobima na ntango malamumu, pe miníti zomi na mitano esili koleka.

<sup>171</sup> Tata na Likolo, E Nkolo, tika ete ésalema lisusu. Makambo nyonso moyo nauti koloba: “Yesu asili koya pe azali kobenga yo.” Asalaka nini ntango Ayaka? Abengaka. Pe tika ete ésalema

lisusu, Nkolo. Tika ete Molimo Mosantu na Yo éya kati na bato na mpokwa oyo, Nkolo Yesu na lolenge ya—ya Molimo. Tika ete Áya na mpokwa oyo pe Ámimonisa, na sima, Ámitalisa. Lokola bato wana, ndenge bandimaki, biso pe tokondima, Nkolo. Ezali na bato mingi awa baoyo, ntango mosusu, bazuá naino libaku oyo te. Tobondeli ete Ópesa bango yango lisusu na mpokwa oyo. Mpo tosengi yango mpo na nkembo ya Nzambe, na Nkombo na Yesu. Amen.

<sup>172</sup> Ezali solo, ndeko mwasi, kasi kóba kokende liboso na yango. Ezali malamu. Kóba kokende liboso. Oh, bózala na kimia mpenza, bato nyonso.

<sup>173</sup> Bondimi ete Ayei? Ayei. Azali kokóba kobenga, ntango Ayáká? Sikawa soki bokoki bobele kondima. Soki bokoki kondima Liloba na Nzambe, Nzambe akosala yango.

<sup>174</sup> Sikawa bótala, nazali na ntango te ya kobenga molongo ya mabondeli awa. Nakobenga bango kuna, na mpokwa oyo, soki Nkolo alingi. Motei asili koya. Ayei mpo na kokokisa Liloba na Ye na ntango ya suka. Pe oyo Azalaki na eleko wana, Azali yango lelo. Oyo kotalisama to komitalisa na Ye ezalaki na eleko wana, ezali pe bongo lelo, mpo Azali bobele Liloba na Nzambe. Bondimi yango? [Losambo balobi: “Amen.”—N.D.E.] Pe Liloba na Nzambe Esósólaka makanisi, ba-mposa ya motema. Pe lolenge Asalaki na eleko wana, ezali lolenge Asalaka ntango nyonso. Azali bobele motindo moko. Soki Asali yango sikawa, bokondimela Ye? Ekosala ete bóndimela Ye?

<sup>175</sup> Bino baoyo bozali wana sikawa, bótika nátala naino mpo náyeba soki ezali na moto moko, oyo nayebi, moto moko oyo azali esika moko awa na kati, oyo nayebi.

<sup>176</sup> Bato nyonso oyo bazali zonga-zonga, *awa*, baoyo bayebi ngai te, bótombola maboko; boyebi ete nayebi likambo na bino ata moke te, pe bozali na bokono, bótombola maboko. Nabanzi, bato nyonso. Malamu, sikawa, bóndima. Bóndima na motema na bino nyonso. Bótia ntembe te. Bózala na kondima. Bóndimela Nzambe.

<sup>177</sup> Nakosenga na bino ete bófanda mpenza kimia, bófanda. Bóningana-ningana te sikawa, nabondeli na bino. Bomoni? Bomoni? Bozali bo—bomoto ya kati, nzoto pe molimo. Pe molimo na yo . . . Pe Molimo Mosantu azalaka nsoni-nseni mpenza.

<sup>178</sup> Bato boni bazali komikanisela, eleki mibu mingi, ete Molimo Mosantu, ntango nalekaki awa pe nayebisaki bino yango? Ntango nazaláká kosimba bato na loboko, Ayebisaki ngai ete lisosoli oyo ekoya, pe na sima, ekokende liboso? Bozali komikanisela yango, bozali komikanisela na yango? Kasi Alobaki: “Soki okoki komema bato kondimela yo.” Bozali komikanisela ntango wana, eleki mibu mingi? [Losambo balobi: “Amen.”—N.D.E.] Bosengeli kondima.



179 Namonaki moto moko, nakanisi ezalaki awa, na liyangani mosusu, afandaki mpenza kuna. Pe Molimo Mosantu... Nazalaki kotala-tala ye ntango nazalaki koteya. Azalaki ebósono. Azalaki na ba-nzete ya bibosono na maboko na ye. Pe bobele ntango nabandaki kobenga bato, Satana ayaki likolo na moto yango, elilingi ya moindo. Pe nazalaki kotala yango na miso na ngai mpenza. Atelemaki pe abimaki. Akotikala ebósono libela, bomoni. Na bongo, ye, esika mpenza alingaki kobikisama wana, soki bobele—bobele a... Bomoni? Kasi, nde, nayebi te mpo na nini. Nabanzi ete ayokelaki moyini. Kasi soki otelemi pe omoni bililingi yango, omoni makambo yango ya ndenge na ndenge, lolenge ezalaka, pe otali-tali yango ndenge esalaka. Bomoni, ekozala... .

180 Sikawa, ngai nakoki kobikisa te. Moto oyo alobi na bino ete akoki kobikisa bino, azali na libunga. Bosíla kobikisama. Kasi, ezali likambo ya kososola Bozali ya Yesu Klisto. Sikawa soki Malatá ayebaki ete soki akokaki komona Ye lisusu, ete akozua mposa na ye, mpo Azalaki Liloba etalisami polele, biso pe tokoki kondima yango mpenza te na mpokwa oyo, kondima yango? Na ntembe te, tosengeli mpenza. Asili koya. Asili koya, Asili koya na lolenge ya Molimo Mosantu. Yango nde Oyo Ye azali. Sikawa bóbondela.

181 Bomoni, awa, soki nazalaki na moto moko awa, awa mpenza pembeni na ngai, oyo azali bobele—bobele kobondela; namoni bato mingi mpenza kobondela, ezali bisika nyonso kati na losambo. Bosengeli kotala yango. Bokoki koloba te: “Hé, Ndeko Branham... .” Te, misie. Na—nakoki kosala yango te, ndenge moko pe okoki kolótisa ngai ndóto te. Bomoni? Bokoki kolóta ndóto. Yo, Nzambe akoki kosala ete ómóna ngai na ndoto, bondimi yango, kasi okoki kosala yango yo moko te. Okoki koloba te, ete: “Ndeko Branham, nalingi kolóta yo na ndóto sikawa.” Te, okoki kosala yango te. Ndenge moko pe ngai nakoki komona emononeli te. Ye oyo apesaka yo ndoto, ye nde asengeli kosala yango. Ezali pe ndenge moko mpo na emononeli.

182 Namoni moto moko afandi awa, na suka ya molongo, azali na mingai. Soki andimi na motema na ye mobimba, Nzambe akobikisa ye na mingai yango. Ondimi ete Akosala yango, misie? Oyo afandi kuna, moto ya Mexique, afandi na suka ya molongo, ondimi yango? Malamu, misie.

183 Madame oyo afandi pembeni na yo, ye pe azali na mingai. Ondimi ete Nzambe akobikisa yo, madame? (*Oyo nde ezali kozongisa makelele? Nalingi te ete bato bázanga koyoka yango.*) Ondimi? Malamu.

184 Bongo elenge mwasi mosusu ya Mexique, oyo afandi pembeni na ye? Azali na bokono ya líkundú. Ondimi ete Nzambe akobikisa líkundú na yo, madame?

<sup>185</sup> Asili kozua yango. Soki namoni Pole yango kokita, elingi koloba ete esalemi. Iyo. Ezali yango. Ebetaki ye. Ezalaki wana, ezalaki kobaluka-baluka. . . [Maloba mazangi na eteni oyo ya bande—N.D.E.] . . . esalaka yango. Bomoni? Soki Akoki kokuta kondima! Bomoni: “Akokaki kosala makambo mingi te mpo na kozanga kondima na bango.”

<sup>186</sup> Ezali na mwasi moko afandi awa pe azali kobondela, bobele awa. Azali kobanga. Asengeli mpenza. Azali na bokono ya cancer, ezali makasi mpenza. Ngai nayebi yo te, kasi Nzambe ayebi yo. Ondimi ete Nzambe akoki koyebisa ngai likambo ya cancer yango, to likambo mosusu? Tala ngai. Ezali na bato mingi mpenza oyo bazali kobondela, bomoni, yango wana nazali koloba yango. Bótala biso. Sikawa, iyo, ozalaka awa te, oyo ezali engumba na yo te. Outi esika moko ebéngami Porterville, na Californie. Ezali solo. Ondimi ete Nzambe akoki koyebisa ngai nani yo ozali? Ye ayebi. Nkombo yo ezali Madame Wintham. Ezali solo. Sikawa ndima, pe cancer yango ekotika yo. Soki okoki kondima! Yango nde nyonso oyo Nzambe asengi na yo kosala. Soki okoki kondima!

<sup>187</sup> Bondimi yango te na motema mobimba? Moto moko na ngámbo *oyo*, okoki kondima te? Motei asili koya pe Abengi bino. Azali kobenga bino longwa na kufa kino na Bomoi, longwa na bokono kino na nzoto kolongono.

<sup>188</sup> Tala moto moko oyo afandi awa na sima mpenza, agumbi motó, azali kobondela. Azali mpenza kobondela mpo na ye moko te, azali kobondela mpo na moto mosusu. Ezali mwa—mwana mwasi. Ezali mwana na ye ya mwasi. Ondimi, misie? Ozali na mpasi na makolo na yo. Ozali na mpasi na libolongo na yo. Ezali solo. Ozali na ntina ya kolela te, Ye nde azali pembeni na yo. Mwana na yo ya mwasi azali na lopitalo, boye te? Na bokono ya mónkóti. Ndima. Ondimi? Motei asili koya pe Azali kobenga ye. Lokola tata na ye, ondimi? Ondimi? Tika ete Ákende kotala ye na butu oyo, ná yo pe. Tika ete éсила.

<sup>189</sup> Elenge mobali moko azali awa, mwana mobali na suki ya mwa moindo. Azali na bokono ya lopuso, ná ya mpéma mokuse, elenge mobali ya Mexique, mwana moke ya Mexique, oyo afandi kuna. Azalaka awa te. Auti na San Jose. Mwana, ondimi? Likambo mosusu, tata na yo azali awa elongo na yo. Azali motei. Ezali solo. Ondimi ete Nzambe akoki koyebisa ngai nkombo na yo? Ekosala ete óndima mpenza makasi? Nkombo na yo Reuben. Sikawa ndima. Ah-ha. Nzambe akobikisa yo.

<sup>190</sup> Motei ayei pe Azali kobenga yo. Oh, mosumuki, oh, mobéli, ozali komona te Motei atalisami polele kati na bato, kati-kati na bandimi? Asili koya mpo na kobenga bana na Ye bandimaka kozala na nzoto kolongono. Ayei mpo na kobenga mosumuki kobongola motema. Mozóngi sima, mondimi ya losambo, Motei ayei mpo na kobenga yo.

<sup>191</sup> Bondimi yango? Bondimi yango mpo na bosenga na bino sika-sikawa? Soki ondimi, tombola loboko, loba: “Nandimi mpo na bosenga na ngai.” Na bongo téléma sikawa pe yamba yango. Motei ayei pe azali kobenga yo. Pe ata ozali nani, ata ozali na bosenga nini, Motei ayei pe Azali kobenga yo. Azali motindo moko lobi, lelo pe libela.

<sup>192</sup> Elenge mwasi wana akendeki na engumba, pe alobaki: “Bóya kotala Moto oyo Ayebisi ngai makambo na ngai ya mabe.” Yo okendeki na engumba te. Oyaki pe osili komona yango, yo moko, na bongo Motei asili koya pe azali kobenga yo.

<sup>193</sup> Tómbóla mabóko, sanzola Ye, pe loba: “Nkolo Yesu, nazali mosumuki; limbisa ngai. Nazali mozóngi sima; zongisa ngai na nzela, Nkolo. Nazali na bosenga ya Molimo Mosantu; tóndisa ngai. Nazali na bokono; bikisa ngai. Nazali ebósono; bikisa ngai.” Motei asili koya pe azali kobenga yo. Tómbola mabóko sikawa pe sanzola Ye. Amen.

<sup>194</sup> (Tindela biso loyembo oyo: “Nakosanzola Ye, nakosanzola Ye.” Oyebi yango? *Nakosanzola Ye*. Oyebi yango, boye te?)

Bondimi?

Nakosanzola Ye, nakosanzola Ye,  
Oh, bósanzola Mwana-mpate oyo akufaki mpo  
na basumuki;  
Bópesa Ye nkembo, bino nyonso,  
Mpo Makila na Ye elongoli matónó nyonso.

<sup>195</sup> Bolingi Ye? Sikawa bolingi koyembela Ye wana Azali awa, boye te? Azali Molimo oyo ezali kotambola kati na losambo. Ayebi mitema na bino, ayebi makambo na bino nyonso. Tóyembela Ye yango, na motema mobimba.

Nakosanzola Ye, (bótombola maboko, ntango  
bozali koyemba), na... (sikawa bósanzola  
Ye)... kosanzola Ye,  
Oh, bósanzola Mwana-mpate oyo akufaki mpo  
na basumuki;  
Bópesa Ye nkembo, bino nyonso,  
Mpo Makila na Ye elongoli matónó nyonso.

<sup>196</sup> Oh, madame, yo oyo ozali na kiti ya bibósono, soki okoki kondima mwa moke koleka, bobele wana. “Na...” Tómeke yango mbala moko lisusu. Nazali kozela eloko moko.

Nakosanzola Ye, nakosanzola Ye,  
Oh, bósanzola Mwana-mpate oyo akufaki mpo  
na basumuki;  
Bópesa Ye nkembo, bino nyonso,  
Mpo Makila na Ye elongoli matónó nyonso.

<sup>197</sup> Sikawa wana tozali koyemba yango lisusu, baluka, pesa moto moko mbote ya loboko, wana tozali koyemba yango, tóyemba: “Nakosanzola Ye.” Tokei, biso nyonso elongo sikawa.

Nakosanzola Ye, nakosanzola Ye,  
 Bósanzola Mwana-mpate oyo akufaki mpo na  
 basumuki;  
 Bópesa Ye nkembo, bino nyonso,  
 Mpo Makila na Ye elongoli matónó nyonso.

<sup>198</sup> Oh, moninga na ngai mosumuki, okoki te koya awa sikawa? Bóya kopesa Ye masanzoli, bino nyonso. Bino nyonso baoyo bolingi kotatola Ye lokola Mobikisi. Liboso na Ye, wana basantu bazali kokumbamela na Molimo, okoki koya kotelema awa, boye te? Loba: “Nalingi kotatola, na mpokwa oyo. Nalingi kosanzola Ye. Nalingi koya. Nazali koyoka Ye nsoni te. Nalingi ete mokili éyeba ete nayambi Ye lokola Mobikisi na ngai, bobele awa, wana Azali awa.” Yaka, wana tozali koyemba yango.

Nakosanzola Ye, (oboyi koya?) nakosanzola Ye,  
 Oh, bósanzola Mwana-mpate oyo akufaki mpo  
 na basumuki;  
 Oh, bópesa Ye nkembo, bino nyonso,  
 Mpo Makila na Ye elongoli matónó nyonso.

<sup>199</sup> Oh, ezali yango, madame, yaka sikawa. Nani mosusu alingi koya, Liboso ya Klisto? Yaka kino awa, ndeko mwasi, téléma awa.

<sup>200</sup> Moto mosusu oyo alingi ete Ázala Mobikisi na yo, sikawa, moto oyo azali na nsoni te. Alobaki: “Soki oyoki Ngai nsoni na miso ya bato, Ngai pe nakoyoka yo nsoni na miso ya Tata na Ngai pe Banje ya bulee.” Soki oyoki Ye nsoni te sikawa, pe olingi ete Ázala Mobikisi na yo, wana Azali awa! Bosili komona Ye. Ebongi mpenza be, Liloba Ye moko azali kotalisa Yango polele. Yaka, wana basantu bazali kokumbamela sikawa. Oboyi na yo koya?

<sup>201</sup> Nzambe ápambola yo, misie. Mobange mwasi moko azali koya, akomi mpenza mokóló. Sikawa, oboyi na yo koya?

Nako . . . (bóyemba yango sikawa) . . .  
 nakosanzola . . .

<sup>202</sup> Ezali malamú, bilenge, bóya noki. Bósanzola. Nzambe ápambola yo, madame, basalaka nde bongo. Nzambe ápambola bino, bilenge.

. . . oyo akufaki mpo na basumuki;  
 Bópesa Ye nkembo, bino nyonso,  
 Mpo Makila na Ye elongoli matónó nyonso.

<sup>203</sup> Ntango oyo batei bazali kokende epai ya bato oyo sikawa, moto mosusu akoki koya te? Mozóngi sima, okoki koya, pe koloba: “Nazali na nsoni mpo na bomoi na ngai?” Azali awa. Bondimi ete nazali mosali ya Nzambe? Bótombola maboko. Ee, Yesu Klisto azali elongo na biso. Boboyi koya?

Bópesa Ye nkembo . . . (Boboyi koya kopesa Ye  
 nkembo?) . . . nyonso,  
 Mpo Makila na Ye elongoli . . .

<sup>204</sup> Malatá, ozali koya, to otikali na ndako elongo na Maria? Okotikala na ebongiseli, mpo na koloba: “Oh, lingomba na ngai endimaka Yango bongo te,” ntango oyo Klisto asili komitalisa polele? Okotikala na sima mpo na koloba bongo, to okobima? “Ee, nakoyebisa yo, ntango ngai . . .” Te. Lelo, ngonga yango oyo. Liwa ezali pembeni na yo, lokola mwana mwasi ya Yailo.

<sup>205</sup> Yaka sikawa! Mozóngi sima, yaka sikawa. Mosumuki, yaka sikawa. Ntango yango oyo. Motei asili koya pe Azali kobenga yo. Azali kobenga yo. Okoloba: “Nakoyeba yango ndenge nini?” Azali kosalela mongongo na ngai. Soki Asaleli mongongo na ngai mpo na kosósola bokono, ba-mpasi pe nyonso wana, boyebi te ete Azali pe kobenga mpo na masumu? Bóbima! Bóya sikawa, oyo ekoki kozala libaku ya suka mpo na yo.

<sup>206</sup> Mbala moko lisusu, ezali na bato mingi koleka awa, oyo basengeli koya, baninga. Nalingi kotungisa bino te, kobénga bino boye. Ezali malamú te. Soki, ntango mosusu, mbala mosusu oko . . . Bafalisai wana bakanisaki ete babikisamaki, kasi babikisamaki te. Ozali kokanisa likambo yango moko. Yaka sikawa.

<sup>207</sup> Ndimá mpenza! Te, komeka yango te bobele mpo na kosuka na nzela. Soki ezali na mwa ntembe na likanisi na yo, komeka na yo te. Yaka nde sikawa. Sikawa nde ntango yango, sikawa nde ntango oyo Liziba efungwami, ntango oyo Molimo Mosantu ezali awa. Motei asili koya. Mwa ntembe wana, yango nde likambo Azali komeka koyebisa yo: “Ozali kotia ntembe.” Sundóla yango. Yaka, sikawa. Motei asili koya pe azali kobenga yo. Ezali solo, bókoba koya, bókoba bobele koya.

Nakosanzola Ye, nakosanzola Ye, (Boboyi koya kopesa Ye masanzoli?)  
 Bósanzola Mwana-mpate oyo akufaki mpo na basumuki;  
 Bópesa Ye nkembo, bino nyonso,  
 Mpo Makila na Ye elongoli matónó nyonso.

<sup>208</sup> Sikawa ntango oyo basumuki bazali koya, mpo na kotatola Ye; tika ete bato básanzola Ye, wana tozali koyemba yango sikawa. Bótombola maboko, býemba mpo na kosánzola Ye, sikawa, biso nyonso elongo.

Nakosanzola Ye, nakosanzola Ye,  
 Bosanzola Mwana-mpate oyo akufaki mpo na basumuki!

<sup>209</sup> Bópesa Ye masanzoli! Bino baoyo bozali awa, bóbondela, bósenga ete Álimbisa bino. Yango nde Akosala. Motei asili koya pe Azali kobenga bino. Nzambe ápambola bino.



*NA SIMA YESU AYAKI PE ABENGAKI* LIN64-0213  
(Then Jesus Came And Called)

Liteya oyo ya Ndeko William Marrion Branham, eteyamaki liboso na Ngelesa mokolo mwa minei na mpokwa, mokolo mwa 13, sanza ya mibale, mobu 1964, na Elliott Auditorium na Tulare, na Californie, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)